

REGLUGERÐ

um innheimtu gjalds til Búnaðarmálasjóðs.

1. gr.

Greiða skal gjald af vöru og leigusölu í landbúnaði sem rennur í sérstakan sjóð er nefnist Búnaðarmálasjóður. Gjald þetta, sem nefnt er búnaðarmálasjóðsgjald, skal reikna sem hlutfall af þeirri upphæð sem framleiðendum er greidd á hverjum tíma, þ.m.t. sá hluti framleiðendaverðs sem greiddur kann að vera beint til framleiðenda með niðurgreiðslum úr ríkissjóði.

2. gr.

Gjaldskyld vöru- og leigusala skiptist á eftirfarandi hátt:

A. Greiða skal 0,75% gjald af:

- a. alifuglarækt.
- b. svínarækt.

B. Greiða skal 1,5% gjald af:

- a. nautgripaafurðum og lifandi nautgripum til útflutnings.
- b. sauðfjárafurðum og lifandi fé til útflutnings.
- c. afurðum hrossa og lifandi hrossum til útflutnings.
- d. garð- og gróðurhúsaafurðum hvers konar, þ.m.t. trjáplöntur og runnar til skrudgarðyrkju.
- e. loðdýraafurðum og lifandi loðdýrum til útflutnings.
- f. kanínuafurðum og lifandi kaninum til útflutnings.
- g. skógarafurðum hvers konar nema trjáplöntum til skógræktar.
- h. ferðaþjónustu, þó er bíla-, báta- og hestaleiga og veiðileyfi undanþegin gjaldskyldu.
- i. æðardúni.

Landbúnaðarráðherra getur þó heimilað annað hlutfall en að framan greinir að fengnum tillögum frá Stéttarsambandi bænda. Stéttarsamband bænda skal fyrir 1. september ár hvert senda landbúnaðarráðherra beiðni vegna þeirra búgreinafélaga sem óska þess að fella niður eða endurgreiða að hluta eða öllu leyti eða hækka búgreinafélagsgjald í allt að 1%. Stéttarsamband bænda skal einnig fyrir 1. september ár hvert senda landbúnaðarráðherra beiðni vegna þeirra búgreinafélaga sem óska þess að fella niður gjald til forfalla- og afleysingaþjónustu í sveitum. Óskir búgreinafélaga um breytingar skulu hafa borist Stéttarsambandi bænda fyrir 5. ágúst ár hvert.

Landbúnaðarráðherra auglýsir fyrir 15. september ár hvert gjaldahlutfall búnaðarmálasjóðsgjalds yfirstandandi verðlagsár fyrir einstakar afurðir.

Undanþegnar gjaldskyldu eru búvörur og hlunnindaafnot fyrir fjölskyldu framleiðanda, sem ekki hafa komið í sölu.

3. gr.

Búnaðarmálasjóðsgjald það sem um ræðir í 1. gr., greiðist af þeim viðskiptaaðilum sem kaupa eða taka við vörunum frá framleiðendum sem milliliður að smásölu dreifingu og dregst við útborgun afurðaverðs frá því sem framleiðandanum er greitt. Þeir framleiðendur sem selja vöru sína án milliliða til neytenda eða til smásölu aðila, skulu standa skil á gjaldinu. Framleiðsluráð landbúnaðarins annast innheimtu gjaldsins.

Skylt er viðskiptaaðilum, sem greiðsluskyldir eru hverju sinni fyrir gjaldi þessu, að gefa innheimtuaðila fyrir 10. hvers mánaðar staðfesta skýrslu um móttækið vörumagn frá hverjum framleiðanda í næstliðnum mánuði ásamt framleiðandaverði vörunnar nema að það sé ákveðið af verðlagsnefnd búvara.

Framleiðendur sem selja gjaldskylda vöru og leigu án milliliða til neytenda eða til smásöluaðila skulu fyrir 10. hvers mánaðar gefa innheimtuaðila skýrslu um framleiðslu og ráðstöfun þeirra afurða í næstliðnum mánuði. Ennfremur upplýsingar um verðmæti gjaldskyldrar vöru- eða leigusölu nema að framleiðendaverð sé ákveðið af verðlagsnefnd búvara. Þegar framleiðendaverð er ekki ákveðið af verðlagsnefnd búvara, skal innheimtuaðili í byrjun hvers verðlagsárs gera áætlun um hlutfall framleiðendaverðs af útflutnings-, heildsölu- og/eda smásöluverði sem landbúnaðarráðherra staðfestir.

Innheimtuaðili lætur gera eyðublöð fyrir mánaðarskýrslur gjaldskyldra afurða og sendir viðskiptaáðilum og framleiðendum þau, þeim að kostnaðarlausu.

4. gr.

Við útreikning á búnaðarmálasjóðsgjaldi af sláturafurðum skal reikna gjaldið á kíló kjöts að viðbættu verðmæti sláturs og húða, skinna eða gæra eftir því sem við á.

5. gr.

Gjaldskyldum aðilum ber að standa innheimtuaðila skil á búnaðarmálasjóðsgjaldi 25 dögum eftir lok hvers tímabils, þannig:

| | |
|---------------|---------------|
| Gjaldtímabil: | Gjalddagi: |
| sept. – nóv. | 25. desember |
| des. | 25. janúar |
| jan. – febr. | 25. mars |
| mars – maí | 25. júní |
| júní – ágúst | 25. september |

Sé gjaldið ekki greitt innan mánaðar frá gjalddaga skal innheimta dráttarvexti frá gjalddaga af því, sem gjaldfallið er. Dráttarvextir skulu reiknast hinir sömu og hjá innlánsstofnunum, skv. 13. gr. laga nr. 10 29. mars 1961 og ákvörðun Seðlabanka Íslands á hverjum tíma. Búnaðarmálasjóðsgjald má taka lögtaki.

Innheimtuaðili getur heimilað þeim framleiðendum sem hafa með höndum árstíða-bundna vöru- eða leigusölu í landbúnaði að skila skýrslum, sbr. 3. gr., í einu lagi og greiða gjaldið að loknu hverju sölutímabili. Innheimtuaðili getur einnig heimilað einstökum framleiðendum að skila einni skýrslu í lok verðlagsársins og greiða gjaldið samkvæmt henni.

6. gr.

Innheimtuaðila er heimilt að halda gjaldföllnum gjöldum skv. þessari reglugerð eftir hverju sinni þegar skil niðurgreiðslna og útflutningsbóta úr ríkissjóði eða endurgreiðslur af hinu sérstaka kjarnfóðurgjaldi fara fram til viðkomandi aðila.

7. gr.

Ef gögn um viðskipti með gjaldskyldar vörur eða þjónustu þykja að mati innheimtuaðila ófullnægjandi, eða gjaldskyldur aðili skilar ekki skýrslum skv. 3. gr. og uppgjóri skv. 5. gr., skal innheimtuaðili skora á viðkomandi aðila að bæta úr því innan ákveðins tíma og láta í té skriflegar skýringar og gögn sem innheimtuaðili telur þörf á. Fáí innheimtuaðili fullnægjandi skýringar og gögn innan tiltekins tíma skal gjaldið ákvarðað og innheimt í samræmi við þau.

Berist svar við áskorun skv. 1. mgr. ekki innan tiltekins tíma eða ef skýringar eða gögn eru ófullnægjandi er innheimtuaðila heimilt að áætla gjaldið og innheimta það skv. þeirri áætlun. Senda skal skriflega tilkynningu til greiðanda gjaldsins um áætlunina. Telji greiðandi áætlunina ranga, getur hann innan 20 daga frá og með póstsendingardegi tilkynningar um áætlun gjaldsins krafist þess skriflega að innheimtuaðili taki áætlunina til endurskoðunar. Skal sú krafa rökstudd með söluskrám eða öðrum nauðsynlegum gögnum. Innheimtuaðili skal innan eins mánaðar frá lokum þessa frests gera greiðanda skriflega grein fyrir afgreiðslu á kröfu hans. Heimilt er greiðanda að skjóta lokaafgreiðslu innheimtuaðila til landbúnaðarráð-

herra og skal skrifleg og rökstudd beiðni þar um hafa borist ráðherra innan 30 daga frá póstlagningu lokaafgreiðslu.

Beiðni um endurskoðun á áætlun gjaldsins eða deila um gjaldskyldu frestar ekki eindaga búnaðarmálasjóðsgjalds né leysir undan neinum viðurlögum, sem lögð eru við vangreiðslu þess. Ef gjaldið er lækkað samkvæmt afgreiðslu innheimtuaðila eða úrskurði ráðherra skal endurgreiðsla þegar fara fram.

8. gr.

Jafnhliða búnaðarmálasjóðsgjaldi skal innheimtuaðili á sama hátt innheimta gjald af vöru- og leigusölu í landbúnaði sbr. 2. gr., 0,6%, er renni til Bjargráðasjóðs Íslands, sbr. 5. gr. laga nr. 51/1972 um Bjargráðasjóð ásamt síðari breytingum, hafi stjórn sjóðsins ekki undanþegið vöruna eða leiguna gjaldskyldu að einhverju eða öllu leyti. Ákvarðanir um breytta gjaldskyldu til Bjargráðasjóðs skal taka fyrir 1. september ár hvert og tilkynna þær landbúnaðarráðherra sem auglýsir gjaldahlutfallið með auglýsingu um gjaldahlutföll til Búnaðarmálasjóðs. Óski Stéttarsamband bænda fyrir hönd búgreinafélags, eftir breyttri gjaldskyldu skal beiðni um slíkt hafa borist til Bjargráðasjóðs Íslands fyrir 15. ágúst ár hvert.

9. gr.

Framleiðsluráð landbúnaðarins skiptir innheimtum gjöldum og vaxtatekjum skv. reglugerð þessari mánaðarlega á milli eftirtalinna aðila:

| | Greiðsla af A-fl. skv. 2. gr. | Greiðsla af B-fl. skv. 2. gr. |
|---|-------------------------------------|-------------------------------------|
| a) Til Stéttarsambands bænda | 0,100% | 0,250% |
| b) Til búnaðarsambanda | 0,250% | 0,500% |
| c) Til búgreinafélaga | 0,075% | 0,075% |
| d) Til Búnaðarfélag Íslands | 0,025% | 0,075% |
| e) Til Stofnlánadeildar landbúnaðarins | 0,100% | 0,200% |
| f) Til forfalla- og afleysingaþjónustu í sveitum sbr. lög nr. 32/1979 | 0,200% | 0,400% |
| g) Til Bjargráðasjóðs | 0,600% | 0,600% |

Nú hefur landbúnaðarráðherra að beiðni Stéttarsambands bænda, sbr. 2. gr., vikið frá skiptingu 1. mgr. þessarar greinar hvað varðar stafliði c og f og skal þá haga greiðslum samkvæmt því. Á sama hátt breytast greiðslur til Bjargráðasjóðs, hafi stjórn sjóðsins nýtt sér heimild 8. gr.

Áður en skipting fer fram skal draga frá kostnað við innheimtu og endurskoðun.

Skipting milli búnaðarsambanda skal gerð með hliðsjón af gjaldskyldu framleiðsluverðmæti og gjaldahlutfalli búgreina á hverju búnaðarsambandsvæði.

Skiptingin milli búgreinafélaga skal gerð með hliðsjón af gjaldskyldu framleiðsluverðmæti hvernar búgreinar og gjaldahlutfalli hennar.

10. gr.

Reikninga sjóðsins skal birta árlega í Búnaðarritinu og Árbók landbúnaðarins, endurskoðaða af endurskoðendum Búnaðarfélag Íslands og Stéttarsambands bænda.

11. gr.

Rísi ágreiningur um gjaldskyldu eða önnur atriði varðandi reglugerð þess sker landbúnaðarráðherra úr þeim ágreiningi.

12. gr.

Reglugerð þessi er sett samkvæmt heimild í lögum nr. 41 15. maí 1990 um Búnaðarmálasjóð og öðlast þegar gildi. Jafnframt er úr gildi felld reglugerð nr. 631 11. nóvember 1982 um innheimtu gjalda til Búnaðarmálasjóðs.

Ákvæði til bráðabirgða.**I.**

Prátt fyrir ákvæði 9. gr. skal Stofnlánadeild landbúnaðarins halda tekjum eins og orðið hefðu að óbreyttum lögum til 30. nóvember 1990. Skal Búnaðarmálasjóður því greiða Stofnlánadeild þær tekjur sem ella hefðu runnið þangað mánuðina september, október og nóvember 1990. Jafnframt skerðast tekjur annarra aðila skv. 9. gr. þannig að mánuðina september, október og nóvember 1990 verða greiðslur til búnaðarsambanda og Stéttarsambands eins og þær hefðu orðið að óbreyttum reglum, greiðslur til Bjargráðasjóðs verða samkvæmt þessari reglugerð, en greiðslur til annarra aðila falla niður.

II.

Prátt fyrir heimildarákvæði 3. mgr. 2. gr. og 8. gr. skal gjaldahlutfall búnaðarmálasjóðsgjalds og bjargráðasjóðsgjalds á tímabilinu 1. september–31. desember 1990 vera skv. 1. mgr. 2. gr. og 1. málslíð 8. gr.

Landbúnaðarráðherra auglýsir fyrir 20. desember 1990 gjaldahlutföll einstakra búgreina fyrir tímabilið 1. janúar til 31. ágúst 1991.

Landbúnaðarráðuneytið, 1. október 1990.

Steingrímur J. Sigfússon.

Jón Höskuldsson.

AUGLÝSING

**um breyting á reglum nr. 77/1986 um ársreikning
viðskiptabanka og sparisjóða.**

Í stað núverandi 12. gr. komi ný grein sem orðist svo:

Framsetning lífeyrisskuldbindinga skal vera með þeim hætti sem greinir í eftirfarandi tölulíðum 1 til 5:

1. Allir bankar og sparisjóðir sem tekið hafa á sig lífeyrisskuldbindingar skulu láta fara fram tryggingafræðilegan útreikning á stöðu áfallinna en ógreiddra lífeyrisskuldbindinga sinna og færa í ársreikning, eins og nánar er ákveðið í þessari grein. Miða skal við áunnin lífeyrisréttindi vegna liðins starfstíma og skal hvorki tekið tillit til raunverulegra, né áætlaðra, breytinga á launum einstakra starfsmanna eftir lok reikningsárs. Við útreikning samkvæmt framansögðu skal miða við 3% ávöxtunarkröfu, þ.e. ávöxtun umfram breytingu kaupgjalds. Heimilt er að miða við lægri ávöxtunarkröfu enda sé getið um það í skýringum með ársreikningi. Yfirlit yfir helstu forsendur skal fylgja útreikningi á áföllnum lífeyrisskuldbindingum á eyðublaði sem bankaefirlitið lætur í té.
2. Tryggingafræðilegur útreikningur, sbr. 1. tölulíður þessarar greinar, skal að jafnaði fara fram árlega en þó eigi sjaldnar en á þriggja ára fresti. Fari ekki fram árlegur útreikningur skal ákvarða stöðu áfallinna skuldbindinga með tryggingafræðilegri áætlun.
3. Lífeyrisgreiðslur, sem banki eða sparisjóður innir af hendi vegna starfsmanna sem látið hafa af starfi, skulu færast til lækkunar á áföllnum lífeyrisskuldbindingum í efnahagsreikningi.